

# In sez en la regenza e forza da fracziun en il parlament

Radunanza da nominaziun da la Partida populara svizra (pps) dal Grischun en l'otel Marsöl a Cuira

DA MARTIN CABALZAR

■ **In sez en la regenza grischuna e forza da fracziun en il cussegl grond. Quai è tenor il vicepresidente Andrea Davaz las finamiras da la pps grischuna en vista a las elecziuns guvernamentalas e circuitalas dals 18 da matg 2014. Considerond la cumpart da 25 pertschient da las vuschs acquistadas en las ultimas elecziuns dal cussegl naziunal saja la pps absolutamain sutpreschentada en il gremis politics dal Grischun.**

La bain frequentada radunanza da la pps dal Grischun en l'hotel Marsöl a Cuira ha cumenzà cun musica populara da la chapella «Stelser Buoba» e cun il psalm svizzer chantà en pe. En ses votum introductiv ha il vice-parsura deputà *Andrea Davaz* (Fläsch) punctuà ch'i dovria ex num puspè ina represchentanza da la pps en la regenza grischuna che sa movia adina dapli cunter la sanestra. El illustrescha quai cun intgins exempels. La promoziun unilateral da l'energia solara e da vent effectueschian ina perdita da valor da l'energia idraulica. En il Plan d'instrucziun 21 sajan creativitat e bainesser en scola pli impurtants che leger, scriver e far quint. La nova lescha da scola chaschunia al chantun ed a las vischnancas expensas supplementaras da radund 13 milliuns, uschia che la furmazion daventia la finala nunpajabla per il Grischun. En il medem temp vegnia la qualitad da la scola adina mendra. En scola regia actualmain in veritabel vezi e boom da terapias. Era saja la personalitad dal magister pli impurtanta per il success da la scola ch'il dumber da computers en stanza da scola. I saja perquai nairas uras ch'il departament d'educaziun giaja puspè en mauns burgais, punctuescha Davaz. La pps fissia averta per in'allianza burgaisa, presump-



Durant la campagna electorala da Heinz Brand vegn a timunar il vice-parsura deputà Andrea Davaz la pps grischuna.

FOTO Y. BÜRKLI

poni che pcd, pld e pbd na fetschian betg in cumplot cun ils sanesters.

## Heinz Brand – «in dals noss»

En curts votums han differents exponts da la pps accentuà las qualificaziuns e l'engaschament dal candidat *Heinz Brand* (59) sin plirs secturs. Il parsura da la pps locala da Claustra-Serneus *Urs Rüedi* ha punctuà las fermas ragischs da Heinz Brand cun Claustra, cun il Partenz e cun la regiun turistica da Tavau/Claustra. Da 1991 fin 2002 ha fatg part Brand dal cussegl da vischnanca da Claustra-Serneus e durant 4 onns è el stà vicepresidente da la secziun locala da la pps. Heinz Brand presidescha plinavant dapi 2002 la Fundaziun Flury che

diregia sco center da sanadad il spital regiunal ad Aschera e pliras chasas da vegls e tgira en Partenz. Cun distincziun haja timunà Brand blers onns l'Uffizi chantunale da polizia e da dretg civil e saja era s'engaschà ferm per il turissem. Sco cusseglier naziunal disponia el plinavant d'excelentas colliaziuns cun Berna, punctuescha Urs Rüedi. Malgrà sia gronda carriera haja Brand mantegnì ses domicil a Claustra e saja daventà «in dals noss» per propi.

## Represchentant da las regiuns

Tenor *Erich Nitz* (Cuira) da la pps giuvna dovra la regenza grischuna urgentamain ina midada da direcziun. Entant ch'ins chattia davos mintga pilaster d'ina punt

in radar vegnian la vaira criminalitad ed il consum da drogas ignorads. En las scolas vegnia propagà creativitat e detenziun stagl prestaziun.

*Gabriela Binkert* (Val Müstair) e *Fulvio Betti* (Poschiavo) accentueschan l'engaschament da Brand per las regiuns perifericas. La regenza dovria personalitads che cumbattian la centralisaziun creschenta en ils centers e la da depopulaziun da las valladas perifericas e per il stan mez. Dumandadas sajan fermas personalitads e betg giratotonas. Betti punctuescha che Brand pledia era talian e chapeschia uschia era meglier lur problems.

Deputà *Jan Koch* (Landquart) taxe-scha la regenza actuala per «flaivla e sen-

za concept». Quai documenteschia il debachel cun la resgia a Domat, la finanziaziun dal turissem, la promoziun d'economia e la politica d'energia. La regenza dovria personalitads che respectian dretg e libertad e ni pessimists ni optimists stravagads, mabain persunas cun agen senn da responsabladad. Era Pablo *Maissen* (Mustér) è da l'avis che la pps cun ina cumpart da vuschs da 25 pertschient meretia in sez en la regenza.

## Betg opposiziun, mabain pronta da surpigliar responsabladad

L'anteriuur cusseglier dals chantuns *Christoffel Brändli* punctuescha che la pps n'intendia betg da far opposiziun, mabain saja pronta da lavurar a moda constructiva e purtar responsabladad en l'executiva. Cun Heinz Brand che haja bunas colliaziuns a Berna battia la partida per ella e betg cunter insatgi, punctuescha Brändli. En in pled umoristic ha illustrà *Leo Hunger* la popularitad ed integritad da Heinz Brand.

## Nominà cun ina ovaziun en pe

Cun in'ovaziun en pe e lung applaus è vegnì nominà cusseglier naziunal Heinz Brand sco candidat da la pps per la regenza grischuna. En ses plects ha accentuà Heinz Brand anc ina giada las finamiras principalas da la pps fixadas en il contract cun il pievel: impedir adhesiun a la UE, reducir taglias, simplifitgar leschas e prescripziuns, cumbatter la criminalitad e franar l'immigraziun.

La pps veglia far ina politica orientada vers la finamira, libra d'interess particulars e da neurosas da profil. Per pudair far quai a moda efficienta stoppia la pps esser represchentada tant en la regenza (executiva) ed avair minimum forza da fraziun en il cussegl grond (legislativa).